



# Komunikado

15 di febrüari 2019

## **CAft: Ehekushon diligente di protokòl ta nesario pa finansa públiko sostenibel**

**Oranjestad – Riba 22 di novèmber 2018 a akordá un protokòl entre Aruba i Hulanda dirigí riba finansa públiko sostenibel. E palabrashon ta ku mas lihé posibel lo realisá un surplus di minimalmente 1% di Produkto Interno Bruto (GDP) riba e presupuesto. Esaki mester pone ku e kuota di debe, kual aktualmente ta suma kasi 90% di GDP, lo mester bai baha substansialmente. Ora tin di bon, lo usa esaki pa redusí e défisit. Mester traha riba saneamentu di finansa públiko pa medio di redukshon konsiderabel di e gastunan di gobièrnu. Kuminsando den 2019 Aruba lo laga su gastunan de personal baha nominalmente. Den e kuadro aki ta importante pa modernisá e sistema di impuesto den forma desdido. Esaki ademas lo ta un estímulo pa e ekonomia.**

A palabrá pa presupuesto di 2019 un défisit di -0,5% di GDP. Pa motibu ku falta informashon relevante i preskribí pa lei, CAft no por evaluá si Aruba ta riba kaminda pa finansa públiko duradero, ku e presupuesto aprobá di 2019. Kalkulashonnan di impuesto i e fondo temporal di presupuesto pa e Plan Sosial di Krisis no ta sufisientemente substansia, loke ta pone ku no por establese kon realístiko e presupuesto ta. Tambe falta un maneho general di dividendo, loke lo mester pone ku por pronostiká entradanan di gobièrnu mas mihó. Den pasado a sosodé ku frekuensia ku a buk dividendonan haltu, ku despues a resultá di no tabata realístiko.

Aruba a kuminsá reformá e sistema di impuesto den aña 2019. Un plan integral di impuesto ainda no ta disponibel. Esaki ta poneku CAft no ta den posishon pa determiná kon realístiko e entradanan di impuesto ta. CAft ta yama riba gobièrnu pa elaborá tal plan ku determinashon i indiká na kua manera por mehorá efisiensia den e servisio di impuesto. Riba otro tereno tambe mester bini mas efisiensia den e aparato públiko. CAft ke mas bista den e fondonan presupuestario di Aruba. Pa CAft no ta suficiente kla na kiko lo bai usa e medionan di e fondonan i kua riesgo e fondonan tin pa presupuesto di e pais. Pa e presupuesto di 2019 CAft no a risibí sufisiente aklarashon huntu ku e Lei di Fondo di Presupuesto Interino pa e Plan di Krisis Sosial.

CAft a bishitá Aruba e último dlanan aki. Manera ta usual, a hiba kòmbersashon ku Gobernador, Minister di Finansa, Asuntunan Ekonómiko i Kultura i Konseho di Minister. Ademas CAft a bishitá Banko Sentral i Konseho di Konsulta. Riba 14 di febrüari e presidente di CAft, señor Raymond Gradus, a tene un charla públiko titulá: "Na kaminda pa finansa públiko sostenibel", den kua el a pone e desaroyo di finansa públiko di Aruba den un perspektiva ekonómiko. E charla a keda organisá den konperashon ku Universidat di Aruba i e presentashon di PowerPoint ta disponibel riba e website di CAft: [www.cft.cw](http://www.cft.cw).

[Fin di Komunikado]

### **Fotógrafa:**

Erik Boeldak

### **Teksto pa foto:**

A palabrá un défisit di -0,5% di GDP pa presupuesto di 2019.

### **Nota pa redakshon – no pa publikashon**

Persona di kontakto na CAft:

Sekretariado di Kolegio di supervishon finansiero Aruba

Manus Twisk - Sekretario

Telefòn (+5999) 461-9081 / (+5999) 461-9082 / (+5999) 461-9084

Email [info@cft.cw](mailto:info@cft.cw)

Internet [www.cft.cw](http://www.cft.cw)



Persona di kontakto pa Prensa:  
Jefka Martina  
Telefòn (+5999) 512-6861